



# GEREJA KRISTEN PROTESTAN INDONESIA

## Resort Sait Nihuta

(GKPI Dame Dr. IL. Nommensen – GKPI Parbubu Pea)  
PARTANGIANGAN KELUARGA PAMUHAH TAON 2022

---

### 01. Marende BE. 70:1-2, “Naung Salpu Taon Na Buruk I”

1. Naung salpu taon na buruk i, Ho ma hupuji Tuhanki  
Ai diramoti Ho tongtong tondingku dohot dagingkon  
Ai diramoti Ho tongtong tondingku dohot dagingkon
2. O Jesus sai asi rohaM, paian dengen ni basaM  
Muse di taon na'mbaru on di nasa huriaM tongtong  
Muse di taon na'mbaru on di nasa huriaM tongtong

### 02. Tangiang Pamuhai

U : Parsaoranta di parsirangan ni taon 2021 dohot pamuhai ni taon 2022 on, mardalan holan di bagasan asi dohot holong ni Debata Ama, Anak, dohot Tondi Parbadia

R : Amen

U : Martangiang ma hita ... Mauliate situtu do pasahatanonnam tu adopanmu ale Tuhan. Nunga pola hubolus hami taon 2021 di bagasan asi ni rohaM. Nuaeng nunga bongot hami di pamuhai ni taon 2022 on. Marhitehite-hite parsaurannami di bagasan borngin on, naeng ma pasahatonnam ngolunami tu adopanMi di na laho mandalani taon 2022 on. Ale Tuhan, bongot ma Ho marhitehite TondiM i tu bagasan roha dohot pingkirannami, asa marhitehite parsaurannami on, tu Ho ma huampehon hami panghirimon laho mandalani taon 2022. Marhitehite asi dohot holong ni Debata Aman, Anak, dohot Tondi Parbadia, martangiang hami tu Ho....

R : Amen

### 03. Marende BE. 64:1-2, “Naung Moru Do Muse Sataon”

1. Naung moru do muse sataon huhut lam suda bohalmi  
Beha do au na sai laon ture do pangalahongki  
Lam ganda haporseaonku nang holong ni rohangku pe  
di Jesus dohot Debatangku nang di donganku sasude
2. Aut alusanku Debatangku ra tung maila au disi  
Marningot salpu ni rohangku ro di sude ulaonki  
Ai dosa do binaen ni tangan gok dosa nang rohangku pe  
Nang pat nang mata nang pamangan, luhut marsala do hape

### 04. Manjaha Epistel: Jesaya 55:7-13

U : Sai ditadingkon halak parjahat i ma dalanna, jala jolma pargeduk i, angka sangkapna, sai mulak ma ibana tu Jahowa, asa marpangulah rohana mida ibana; dohot tu Debatanta, ai buas do rohana manalesei.

R : Ai ndada pingkiranku pingkiranmuna i, jala ndada dalanmuna angka dalanku, ninna Jahowa.

U : Ai songon timbo ni angka langit sian tano on, songon i do tumimbo angka dalanku sian dalanmuna i, jala angka pingkiranku sian pingkiranmuna i.

R : Ai songon hadadabu ni udan dohot ambolas sian langit, jala ndada mulak boti tusi, nda jolo dibornohi tano i jala dipagabe, asa martumburi, jala dilehon boni tu halak panabur dohot roti tu halak na manganhon.

U : Ingkon songon i do hatangki na ruar sian pamanganku: Ndang mulak boti tu ahu, ingkon bahenonna do lomo ni rohangku, jala manjadi tu na hutongos.

R : Ai ingkon di bagasan las ni roha hamu borhat, jala di bagasan hadameon hamu pataruon; pangiaron ni angka dolok dohot robean soarana marolopolop di jolomuna, jala nasa hau di ladang martopaptopap tangan.

U : Singkat ni tadatada tubu ma sampinur, jala singkat ni latong tubu ma bunga na hushus; i ma bahen barita di goar ni Jahowa, bahen tanda salelenglelengna, na so olo hambar.

Martua ma angka na umbege Hata ni Debata, jala na umpeopsa...

R : Amen

## **05. Marende BE. 68:1-2, "Masilelean Angka Taon"**

1. Masilelean angka taon ro di ujungna sogot

O Jesus lehon parrohaon na naeng tongtong marningot

Di halalao ni aringki huhut manimbang ujung ni

2. Diudut Ho do hosangki paidaida ahu

Manang adong parbue ni na niulam di ahu

Hape jotjot tarhirim Ho parbue i ndang olo ro

## **06. Jamita: Jesaya 55:13**

### **Di Bagasan Hadameon Hamu Pataruon**

Nunga somal tabege, hira na satongkin do mardalan partingkian on. Isarana, hira na sangkidop mata do tahilala pardalanan ni taon 2021 na salpu i; hape nuaeng nunga bongot hita tu bona ni taon 2022. Dang pola sanga hita ngolngolan mamolus taon 2021, nang pe di bulan Mei-Juli taon na salpu i, mansai lomos situtu do rohanta ala galumbang na paduahon Covid-19. Godang angka naung masa tabolus di taon 2021

na salpu, jala godang do pe angka na naeng masa sibolusonta tu taon 2022 na naeng ro. Alani, aha ma sipangasahonon laho mamolus taon 2022 na naeng ro i? Holan hata ni Debata do sipangasahonon, ima marhitehite turpuk na naeng siuhalon di bagasan tingki on.

Turpuk di parsirangan ni taon on mian do di sada horong buku Jesaya, ima sian bindu 40-55, manang somal ma i didok *deutro-Jesaya* (Jesaya na paduahon). Jesaya na paduahon on mangondolhon hamuliaon dohot sangap ni Jahowa maradophon pardalanan ngolu ni angka jolma. Nandang adong sangap na asing di ngolu ni jolma i asing sian sangap ni Debata. Alani, boi ma ondolhonon mansai gomos: Marhuaso do Debata maradophon angka na adong ala Ibana do manompa angka na naung adong (patudos tu Johannes 1:3).

Pangantusion na songon i ma sipadomuon tu turpuk di bagasan tingki on, ima huaso ni Debata maradophon angka na adong. Didok di bagasan turpuk on, “Ai ingkon di bagasan las ni roha hamu borhat, jala di bagasan hadameon hamu pataruon” Boi do dohonon, hata bagabaga do on tu hita, lumobi ma laho mandalani taon 2022 na naeng ro on. Alai, bagabaga on mansai maol do lohot tu roha nang tu pingkiranta molo dao hita sian haporseaon: Debata marhuaso maradophon angka na adong. Lapatanna, bagabaga na di bagasan turpuk on boi ma bohah partondion di hita asa mardame dohot marlas ni roha mambongoti taon 2022 molo lohot di hita haporseaon na Debata marhuaso maradophon saluhut.

Debata do na marhuaso maradophon naung adong dohot na naeng adong di ngolunta. Nandang apala taboto boha do rumang ni ngolunta laho mamolus taon 2022 on. Isarana, sai dilului rohanta do, andigan ma salpu habiaran na masa nuaeng ima Covid-19. Dung tadalani taon 2021, sian bonana sahat tu ujungna, hira so adong do tanda parsalpu ni habiaran bolon i. Di bona ni taon 2022 on pe, tong do tubu lomos ni roha ala ni *varian* baru na ginoaran: *Omicron*. Alani, olo ma tubu halomosen, boha do rumang ni ngolunta di taon 2022 on.

Turpuk on ma gabe bohah partondion di hita nuaeng. Dang tolhas tu hita dame dohot las ni roha mamuhai taon 2022 on molo dao hita sian haporseaon, na Debata marhuaso tu saluhut na adong dohot na naeng adong. Marhuaso do Debata tu angka na naeng adong di taon 2022 on. Alani, dame dohot las do rohanta mandalani taon 2022 on molo tahaposi huaso ni Debata maradophon angka na naeng adong di taon on. Unang dao haporseaonta sian huaso ni Debata asa tubu di hita

dame dohot las ni roha. Selamat Taon Baru 2022 ma di hita saluhutna. Amen.

**07. Marende BE. 66:1-2, “Debata Baen Donganmi”**

1. Debata baen donganmi, lao mangula ulaonmu.  
Baen Ibana haposanmu sai paserep rohami  
Debata baen donganmi Debata baen donganmi
2. Debata baen donganmi molo Debata donganmu  
Nandang tarbahren ho be lilu sai ture do langkami  
Debata baen donganmi Debata baen donganmi

**08. Pasahathon Hata Selamat Taon Baru**

*(Diaturhon ma na mandok hata ganup angka anggota keluarga)*

**09. Tangiang Pangondianon**

**10. Marende BE. 66:3, “Debata Baen Donganmi”**

3. Debata baen donganmi sai na saut do ulaonmu,  
Sai na tulus do sangkapmu jala sonang rohami  
Debata baen donganmi Debata baen donganmi

**11. Ayat Pelean: Matius 2:11**

“Laos dibongoti ma bagas i, gabe diida ma Dakdanak i dohot si Maria, inana i. Dung i manungkap ma nasida marsomba tu Dakdanak i, dirungkari ma artanasida: Sere, haminjon dohot angka na angur, parsombanasida tu Ibana”

**12. Marpelean**

**13. Tangiang Pelean**

U : Mandok mauiliate do hami ale Tuhan tu joloM di pamuhai ni taon 2022 on. Nunga tolhas be hataM laho patoguhon haporseaonnami mandalani taon 2022 on. Bongot ma Ho ale Tuhan dibagasan TondiM i tu pingkiran dohot rohanami, laho mangajari hami marhaposan tu huasoM i, asa dibagasan dame dohot las ni roha hami mandalani taon 2022 aha pe angka na masa na naeng sibolusonnami. Laos di bagasan tingki on, nunga hupapungu hami pelean na naeng sipasahatonnami tu huriaM. Ajari ma hami asa lam girgir pasahat pelean tu angka na naeng ro. Laos ajari ma huriaM laho mamangke pelean on hombar tu pangkobasion na adong di huriaM i. Dibagasan Jesus Kristus, martangiang hami tu Ho. Amen.

Rap martangiang ma hita tu Debata, marhitehite tangiang *Ale Amanami ...*

(Molo adong partohononan di keluarga i, di ujudi ma tangiang Ale Amanami dohot hata pasupas).